

Visoki predstavnik odgovorio na pismo potpredsjednika Čavića

Visoki predstavnik, Wolfgang Petritsch, je u pismu koje je danas uputio potpredsjedniku Republike Srpske, Draganu Čaviću, odgovorio na pitanja po kojima je gospodin Čavić izrazio zabrinutost, a koja se tiču ustavnih amandmana u Federaciji Bosne i Hercegovine i statusa konstitutivnih naroda u kantonima Federacije. Visoki predstavnik se saglasio da se slovo i duh Sporazuma Mrakovica-Sarajevo od 27. marta 2002. godine moraju u potpunosti provesti i u Republici Srpskoj i u Federaciji Bosne i Hercegovine, kako bi se osigurala konstitutivnost Srba, Bošnjaka i Hrvata na cijeloj teritoriji BiH.

Visoki predstavnik je konstatirao da je u Sporazumu predviđeno usklađivanje ustava kantona sa principima iz Sporazuma. U svom pismu Visoki predstavnik je pojasnio činjenicu da Sporazum predviđa "da će principi sadržani u Sporazumu biti primijenjeni na kantone Federacije BiH u roku od devet mjeseci od usvajanja amandmana na Ustav Federacije BiH. Osim toga Sporazum predviđa uspostavu mehanizama za zaštitu vitalnog interesa u kantonima i garanciju barem minimalne zastupljenosti u kantonalnim organima vlasti."

Visoki predstavnik je rekao da se "principi i relevantni član Sporazuma od 27. marta 2002. godine odražavaju u promjenama na Ustav Federacije koje je 4. aprila 2002. godine predložila Vlada Federacije."

Visoki predstavnik je dao uvjeravanja gospodinu Čaviću da će on i njegov ured insistirati na blagovremenoj i dosljednoj provedbi tih principa u skladu sa slovom i duhom Sporazuma Mrakovica-Sarajevo od 27. marta 2002. godine i Odluke Ustavnog

suda.

U ovom kontekstu visoki predstavnik želi istaknuti da je Sporazum zaključen nakon dugotrajnog procesa pregovora u kojem su razmotrena sva pitanja od interesa inicirana od strane svih partnera u pregovorima.